

曾文正公家書

第二冊

民國二十一年九月

曾文正公家書

第二冊

中央政治學校總務處印刷所印

曾文正公家書卷七

咸豐十年六月初十日

沅弟左右出隊以護百姓收穫甚好與吉安散耕牛籽種用意相似吾輩不幸生當亂世又不幸而帶兵日以殺人爲事可爲寒心惟時時存一愛民之念庶幾留心田以飯子孫耳楊鎮南之哨官楊光宗頭髮橫而盤吾早慮其不馴楊鎮南不善看人又不善斷事弟若看有不妥叶之意卽飭令仍回兄處兄另撥一營與弟換可耳吾於初十日至厯口十一日擬行六十里趕至祁門縣十二日先太夫人忌辰不欲紛紛迎接應酬也甯國府一軍緊急之至吾不能撥兵往援而擬少濟之以餉亦地主之道耳

六月十九日

沅弟左右十八日專丁到接十五信得知一切應復之件條列具左

一陳米千餘石如不可吃不必強各營領之凡糧臺事件弟皆自行當家不必一一請示或有疑義就近與希庵爲之渠閱歷頗久思力沈着與弟可互相切嗟互相資益也

一楊光宗業已斥革遞解此後應稍安靜馬兵旣難得力可飭令楊鎮南招募馬勇其兵丁每出十缺（馬缺）卽飭令仍回殷開山營盤余於辦馬隊不惜重本志在辦成一事若操練半年仍不得力則浪費過甚不如趁早改

兵爲勇陸續更換

一雪琴釐金之事概仍八九等年之舊絲毫不改斷不至掣雪之肘牙釐既由我處作主輔亦不致難爲雪也未一條概以大度容之不另復矣

六月二十二日

沅弟左右希厚雪三人皆主土城合圍之說自應及時興辦正東自車徑渡至韋家店地勢遼闊繁用衆用馬之地弟處兵力本單老營勁營尤少兄不甚放心然此時桐城有兵縱陽有兵青草壩有兵若不趁此合圍則天下更無可辦之事矣餉兵不甚可恃然不能不冒險一辦辦成之後則不險矣土功太太太難恐勇尙有不敷可商之莫善徵雇用民夫其始略用霸道其後日日給價民間亦必悅服多用銀數千兩兄必辦解不惜也盛暑興工宜以早夜爲之午未申三時均宜停止黃南坡籌餉事已發札矣茲將意城所擬札稿寄閱東流周萬倬一營不須兄札或厚庵札或弟札朝發則夕至矣曾得勝寶右營在建德普欽堂處防池州張家灘一路之賊吾飭曾營紮建城東以當頭敵目下實難抽調當另設法

六月二十七日

季弟左右頃接沅弟信知弟接行知以訓導加國子監學正銜不勝欣慰官階初晉雖不足爲吾季榮惟弟此次出山行事則不激不隨處位則可高可卑上下大小無人不翕然悅服因而凡事皆不拂意而官階亦由之而晉

或者前數年抑塞之氣至是將暢然大舒乎易曰天之所助者順也人之所助者信也我弟若常常履信思順如此名位豈可限量吾湖南近日風氣蒸蒸日上凡在行閒人人講求將略講求品行並講求學術弟與沅弟既在行閒望以講求將略爲第一義點名看操等粗淺之事必躬親之練膽料敵等精微之事必苦思之品學二者亦宜以餘力自勵日前能做到湖南出色之人後世卽推爲天下罕見之人矣大哥豈不欣然哉沅弟以陳朱發民夫挑濠極好極好此等事弟等儘可作主兄不吝也

六月二十八日

沅季弟左右探報閱悉此路並無步撥卽由東流建德驛夫送祁建德令已死代理者新到故文遞遲延弟以後要事須專勇送來三日可到或逢三八專人來一次每月六次其不要緊者又由驛發來則兄弟之消息尤常通矣文輔卿辦釐金甚好現在江西釐務經手者皆不免官氣太重此外則不知誰何之人如輔卿者能多得幾人則釐務必有起色吾批二李詳文云須冗員少而能事者多入款多而坐支者少又批云力除官氣嚴裁浮費弟須囑輔卿二語無官氣有條理守此行之雖至封疆不可改也有似輔卿其人者弟多薦幾人更好甲三啓行時溫弟婦甚好此後來之變態也

七月初三日

沅季弟左右專丁到接二十八夜緘具悉一切東流在江邊周萬倬一營駐焉向歸厚庵調遣建德在山內去江五

十里普欽堂全軍駐焉向歸江西調遣曾得勝者普部九營中之一營也池州賊來東流則畏水師若至建德並不與水師相干全調普軍則可專調曾營則不可弟屢指調該營似不甚當於事理兄目下實無以應弟之請亮之長濠用民夫斷非陳米千石所可了必須費銀數千此等大處兄卻不肯吝惜有人言莫善徵聲名狼藉既酷且貪弟細細查明凡養民以爲民設官亦爲民也官不愛民余所痛憾甯國尙未解圍聞賊將以大隊救安慶南岸似可漸鬆南坡信大有可採此人真有幹濟之才可敬可敬

七月初八日

沅弟左右輔卿而外又薦意卿柳南二人甚好柳南之篤慎余深知之意卿亮亦不凡余告筱輔觀人之法以有操守而無官氣多條理而少大言爲主又囑其求潤帥左郭及沅薦人以後兩弟如有所見隨時推薦將其人長處短處一一告知阿兄或告筱荃尤以習勞苦爲辦事之本引用一班能耐勞苦之正人日久自有大效季弟言出色之人斷非有心所能做得此語確不可易名位大小萬般由命不由人特父兄之教家將帥之訓士不能如此立言耳季弟天分絕高見道甚早可喜可愛然辦理營中小事教訓弁勇仍宜以勤字作主不宜以命字諭衆潤帥先幾陳以釋羣疑之說亦有函來余處矣昨奉六月二十四日諭旨實授兩江督兼授 欽差大臣 恩眷方渥儘可不必陳明所慮者蘇常淮揚無一枝勁兵前往位高非福恐徒爲物議之張本耳余好出汗沅弟亦好出汗似不宜過勞

七月十二日

沅弟左右兄膺此鉅任深以爲懼若如陸何二公之前轍則詒我父母羞辱卽兄弟子姪亦將爲人所侮禍福倚仗之幾竟不知何者爲可喜也默觀近日之吏治人心及各省之督撫將帥天下似無戡定之理吾惟以一勤字報吾君以愛民二字報吾親才識平常斷難立功但守一勤字終日勞苦以少分宵旰之憂行軍本擾民之事但刻刻存愛民之心不使先人之積累自我一人耗盡此兄之所自矢者不知兩弟以爲然否願我兩弟亦常常存此念也沅弟多置好官遴選將才二語極爲扼要然好人實難多得弟爲留心采訪凡有一長一技者兄斷不敢輕視謝恩摺今日拜發寧國日內無信聞池州楊七麻子將往攻甯可危之至

七月十五日

沅弟左右浮橋辦齊長濠已有八九分工程甚好甚慰從此援賊雖至吾弟必足以禦之馮事兄處辦法與潤帥不謀而合茲將一批一告示鈔付弟覽翁中丞處復信甚妥弟意疏疏落落亦極是弟總認定是湖北之委員以宮胡兩帥爲上司諸事稟命而行此外一概疏疏落落希庵於此等處界限極清人頗嫌其疏冷然不輕進人卽異日不輕退人之本不妄親人卽異日不妄疏人之本處弟之位行希之法似尙妥叶與翁稿與毓稿均好近日修辭工夫亦進慰喜慰喜焦君譜序八九月必報命書院圖須弟起稿而兄改之弟切莫咎兄之吝也

八月初七日

沉季弟左右接專丁來信下游之賊漸漸蠢動九月當有大仗開此賊慣技好於營盤遠遠包圍斷我糧道弟處有水師接濟或可無礙不知多李二營何如有米有柴可濟十日半月否賊雖多善戰者究不甚多禮希或可禦之弟既挖長濠切不可過濠打仗勝則不能多殺賊挫則不能收隊也營中柴尙多否煤已開出否紅單船下去後吾擬札陳舫仙辦大通釐金以便弟就近稽查聞該處每月可二萬餘串也魏柳南宜辦釐乎宜作吏乎弟密告我潘意卿何時可到此間需才極急浙事岌岌請援之書如麻次青今日到祁門其部下十四五可到季弟所言諸枉聆悉定當一一錯之不姑息也

九月初四日

澄侯四弟左右接弟信知家中收成已畢五十姪女漸次痊愈至以爲慰此間近日殊多失意之事次青十九日叢山關敗後廿四平江六營與河溪禮字等四營大敗賊匪圍城次青堅守一日一夜至廿五日申刻破城平江勇自南門走出次青聞亦已出城至今八日尙未接其來信而其胞姪表弟皆堅言其無恙不知究竟如何廿八日賊破休甯日下皖南僅存祁門婺源黟縣及東流建德而已聞賊已分大半由嚴州入浙而自婺源入江之路亦不可不防現調鮑軍紮漁亭凱章黟縣均去老營不過六十里軍勢已穩人心已定牧雲與甲三初一日由祁門赴安慶大約十月底可歸也希庵初四日到祁門帶四營遠來救援不久仍當回岸耳余身體平安目光日昏精神亦日見日老深懼無以符此大任

九月初七日

沅弟左右徽州休甯之賊日內尙未動作鮑張兩軍日內亦休息未進祁門黟縣等處漸有買米鹽者希庵所帶四營整令紮去祁六十里之歷口地方防西路之賊穿建德祁門中間而走景德鎮卽去年沅弟破景德鎮賊之出路也次青廿五日城破走出廿六夜在街口所發信初六夜乃接到廿五夜所奉 寄諭初六日乃恭摺復奏茲鈔去一閱不知 皇上果派國藩北上抑繫派潤帥北上如繫派我北上沅弟頗同去否爲平世之官則兄弟同省必須迴避爲勤王之兵則兄弟同行愈覺體面望沅弟卽日定計復書告我無論或派我或派潤帥皆須帶萬人以行皖北皖南兩岸局勢必大爲抽動請弟將如何抽法如何布置開單見告一切皆暗暗安排胸有成竹一經奉 旨旬日卽可成行兩弟以爲何如

九月十四日

沅弟左右安慶決計不撤圍江西決計宜保守此外或棄或取或抽或補合衆人之心思共謀之北援不必多兵但卽吾與潤帥二人中有一人遠赴行在奔問官守則 君臣之義明將帥之職著有濟無濟聽之可也

九月二十一日

沅弟左右接來緘知營牆及前後壕皆倒良深焦灼然亦恐是挖壕時不甚得法若客土覆得極遠雖雨大不至仍倒入壕內庶稍易整理至牆子則無不倒坍不惟安慶耳徽州之賊竄浙者十之六七存府城及休寧者聞不

過數千人不知確否連日雨大泥深鮑張不能進勦深爲可惜季高尙在樂平余深恐賊竄入江西腹地商之季高無遽入皖季高亦以雨泥不能速進也潤帥謀皖已大半年一切均有成竹而臨事復派人救援六安與吾輩及希庵等之初議全不符合鎗法忙亂而弟與希庵皆有驕矜之氣茲爲可慮希庵論事最爲穩妥如潤帥有鎗法稍亂之時弟與希婉陳而切諫之弟與希之矜氣則彼此互規之北岸當安然如泰山矣

九月二十三日

沅弟左右接僞文二件知安慶之賊望援孔切只要桐城青草塢能少堅定自有可破之理次青十六日回祁僅與余相見一次聞其精神尙好志氣尤壯將來或可有爲然實非帶勇之才弟軍中諸將有驕氣否弟日內默省傲氣少平得幾分否天下古今之庸人皆以一惰字致敗天下古今之才人皆以一傲字致敗吾因軍事而推之凡事皆然願與諸弟交勉之此次徽賊竄浙若浙中失守則不能免於吳越之痛罵然吾但從傲惰二字痛下工夫不問人之罵與否也

九月二十四日

沅弟左右沅弟以我切責之絨痛自引咎懼蹈危機而思自進於謹言慎行之路能如是是弟終身載福之道而吾家之幸也季弟信亦平和溫雅遠勝往年傲岸氣象吾於道光十九年十一月初二日進京散館十月二十八早侍祖父星岡公於階前請曰此次進京求公教訓星岡公曰爾的官是做不盡的爾的才是好的但不可傲滿

招損謙受益爾若不做更好全了遺訓不遠至今尙如耳提面命今吾謹述此語誥誠兩弟總以除傲字爲第一義唐虞之惡人曰丹朱傲曰象傲桀紂之無道曰強足以挂諫辨足以飾非曰謂已有天命謂敬不足行皆傲也吾自八年六月再出卽力戒惰字以儆無恆之弊近來又力戒傲字昨日徽州未敗之前次青心中不免有自是之見旣敗之後余益加猛省大約軍事之敗非傲卽惰二者必居其一巨室之敗非傲卽惰二者必居其一余於初六日所發之摺十月初可奉 諭旨若奉旨派出十日卽須成行兄弟遠別未知相見何日惟願兩弟戒此二字並戒各後輩常守家規則余心大慰耳

十月初四日

澄侯四弟左右八月廿四發去之信至今未接覆信不知弟在縣已回家否余所改書院圖已接到否圖係就九弟原稿改正中間添一花園以原圖係點文章一箇板板也余所改規模大崇閎當此大亂之世興造過於壯麗殊非所宜恐劫數或有他慮弟與邑中諸位賢紳熟商去年沅弟起屋太大余至今以爲隱慮此事又繫沅弟與弟作主不可不慎於始弟向來於盈虛消長之機頗知留心此事亦當三思至囑至囑鮑張廿六進兵廿九日獲一勝仗日內圍紮休寧城外祁門老營安穩余身體亦好惟京城信息甚壞皖南軍務無起色且愧且憤家事有弟照料甚可放心但恐黃金堂買田起屋以重余之罪戾則寸心大爲不安耳

全目

沉弟左右日內不知北岸賊情何如至爲系念季弟賜紀澤途費太多余給以二百金實不爲少余在京十四年從未得人二百金之贈余亦未嘗以此數贈人雖由余交游太寡而物力艱難亦可概見余家後輩子弟全未見過艱苦模樣眼孔大口氣大呼奴喝婢習慣自然驕傲之氣入於膏肓而不自覺吾深以爲慮前函以傲字箴規兩弟兩弟猶能自惕若以傲字誥誡子姪則全然不解蓋自出世以來祇做過大並未做過小故一切茫然不似兩弟做過小吃過苦也

十月初五日

沉弟左右初四日接奉二十日寄諭吏務和議已成鮑軍可不北上九月初六日請派帶兵入衛一疏殆必不准從此可一意圖東南之事安慶所挑余親兵兩哨若悉繫上選恐狗賊來援打仗又少些好手弟細心斟酌或待擊退狗援後再令兩哨南渡亦無不可余前廿八日一緘謂不須挑人來安是恐安慶挑出好手難當大敵也此次商令緩來則專爲恐扯薄安慶起見弟細酌之賊若有大股從練潭來集賢關弟軍足支持二三日否干言萬語都不要緊惟此是性命關頭次青以不能戰守身敗名裂弟所爭者在能守與否若能安住四五日則希庵之援兵必至矣專意待希之救萬一希被桐城等處之賊牽制不能援懷亦事勢之所時有弟此刻與諸將約定預爲守營五日晝夜不息之計賊初來之日不必出隊與戰但在營內靜看看其強弱虛實看得千準萬準可打則出營打仗不可打則始終堅守營盤或有幾分把握開迪庵於六年八月在武昌擊石遺援賊卽堅守靜待

之法每日黎明賊來撲營堅守不動直至申酉間始出擊之故無日不勝希庵新授皖臬莫令當撤委令希查辦弟詳復之件儘可呈上而莫之効否不係乎此

十月二十日

沅弟左右接信知北岸日內尙未開仗此間鮑張於十五日獲勝破萬安街賊巢十七日獲勝破休寧東門外二壘鮑軍亦受傷百餘人正在攻勦得手之際不料十九日未刻石埭之賊破羊棧嶺而入新嶺桐林嶺同時被破張軍前後受敵全局大震比之徽州之失更有甚焉余於十一日親登羊棧嶺爲大霧所迷目無所睹十二日登桐林嶺爲大雪所阻今失事恰在此二嶺豈果有天意哉目下張軍最可危慮其次則祁門老營距賊僅八十里朝發夕至毫無遮阻現講求守壘之法賊來前堅守以待援師倘有疏虞則志有素定斷不臨難苟免回首生年五十除學問未成尙有遺憾外餘差可免於大戾賢弟教訓後輩子弟總以勤苦爲體謙遜爲用以藥佚驕之積習餘無他囑

十月二十四日

潛侯四弟左右此間於十九日忽被大股賊匪竄入羊棧嶺去祁門老營僅六十里人心大震幸鮑張兩軍於廿一日大戰獲勝克復黟縣追賊出嶺轉危爲安此次之險倍於八月廿五徽州失守時也現賊中僞侍王李世賢僞忠王李秀成僞輔王楊雄清皆在徽境與兄作對僞英王陳玉成在安慶境與多禮沅季作對軍事之能否支

持總在十月十一月內見大分曉甲三十月初六至武穴此時計將抵家余在外無他慮怕子姪習於驕奢佚三字家敗離不得箇奢字人敗離不得箇逸字討人嫌離不得箇驕字弟切戒之

十一月十四日

澄侯四弟左右日內皖南局勢大變初一日德興失守初三婺源失守均經左季翁一軍克復初四日建德失守而余與安慶通信之路斷矣十二日浮梁失守而祁門糧米必經之路斷矣現調鮑鎮六千人攻浮梁朱唐三千人攻建德若不得手則餉道一斷萬事瓦裂殊可危慮余忝竊高位又竊虛名生死之際坦然怡然惟部下兵勇四五萬人若因餉道斷而敗亦殊不忍坐視而不爲之所家中萬事余俱放心惟子姪須教一勤字一謙字謙者驕之反也勤者佚之反也驕奢淫佚四字惟首尾二字尤宜切戒至諸弟中外家居之法則則以考寶早掃書蔬魚豬八字爲本千萬勿忘

十一月二十一日

沉弟左右專丁至接十五日來信知前有四次專人均未到也此次賊圍祁門分三大支西支破建德以入鄱浮東支破江灣及上溪兩營盤以入婺源北支破羊棧各嶺以圖黟縣三支之中以建德一股爲最鉅除守建德之賊二萬餘人外又分爲三支一支竄浮梁景德鎮一支竄鄱陽都昌一支竄彭澤湖口目下守建德一股已被唐桂生攻破竄浮梁一股被左軍小加懲創(十四日殺賊百餘人)亦未得逞鄱陽一股擬分鮑軍會同左軍剿之

竄彭澤一股不知雪琴能守住湖口無恙否若湖口幸得保全無恙則西支之分爲四股者或漸足以禦之賊之全神全力本在西支西支如不得逞則賊氣少沮賊志少衰北支之犯羊棧者十八日凱章得小勝仗廿日鮑軍得大勝仗攻破賊壘驅賊出嶺開殺賊三四千人經此大創北支似亦不得逞惟東支若由婺源以犯樂平直入江西腹地刻無兵力足以制之實深焦灼北岸狗逆未大受懲不久又有大舉不特希庵不可分兵來南岸卽章部亦不可輕動總須以全力謀懷桐也

十二月初四日

澄侯四弟左右自十一月來奇險萬狀風波迭起文報不通者五日餉道不通者二十餘日自十七日唐桂生克復建德而皖北沅季之文報始通自鮑鎮廿八日至景德鎮賊退九十里而江西饒州之餉道始通若左鮑二公能將浮梁鄱陽等處之賊逐出江西境外仍從建德竄出則風波漸平而祁門可慶安穩矣余身體平安此一月之驚恐危急實較之八月徽甯失守時險難數倍余近年在外問心無愧死生禍福不甚介意接到英法米各國通商條款大局已壞令人心灰茲付回二本與弟一閱時事日非吾家子姪輩總以謙勤二字爲主戒傲戒惰保家之道也

十二月十六日

沅季弟左右欒陽壩工未成亦屬意中之事不必焦灼大江極深古人所謂江深五里海深十里也兩岸支河入江

者極淺極高夏月江漲則支河更高倒灌各小河之內冬月江涸落至二三丈不等小河之水入日時小水高而江水低如二三丈之懸崖甚至江船不能入小河小河之船不能出江以其大陡峻也今年江水不甚涸橈陽河之水至今尙不能行舟卽是極好之事目下又連日霖雨或者橈陽之水竟至年底不枯亦未可知此是弟之運氣頗好不然則十月枯涸久矣至塞壩工程非絕大才調不能不知弟所用者何人余屢次寫信均言未能築成者蓋目中未見有此大才之人也韋軍日內平安否分餘庵數營赴橈陽助韋防守事儘可行公牘嫌其太大余已親筆致緘於餘庵矣第調東流之兵助守橈陽則可調湖口之兵助守橈陽則不可以賊蹤距湖口城尙不過三四十里難遽鬆勁也調陳軍助守橈陽則可調陳軍助圍安慶則不可平日未經弟訓練有素臨危急之際必不聽令也弟此次撥營赴橈陽赴鮑家冲余覺主意不甚老靠蓋撥去未必有益收回則頗有損收回鮑家冲二營則反以長賊之饒收回橈陽一營則反以減韋之勢然大敵將至總以早早收回爲是養足勢力堅守前後兩濠意不旁注神不外散或有濟乎左鮑二公十三日尙未開仗黃文金極善張大威勢而黨羽善戰者少或足禦之僞忠王李秀成於廿八日圍玉山縣攻撲八日城中王德榜顧文彩善於防守初五日解圍去矣祁門四面各百里內日內平安弟可轉告潤帥及希禮厚雪諸公雲仙之處聽渠自爲主當今之世處未必非福出未必非禍從嚴公赴豫恐不相安雲公根器厚而才短與嚴未必鍼芥耳

十二月二十日

沅弟左右十九日專弁二人至接兩弟來信另一片信所關甚大方此軍初至東流衆口交贊之時雪琴卽有信來言其勇不可恃沅弟平日曾言造塢者須下一層好其理至精將來恐須全行遣散另招二千人耳次青事須渠來營一次乃能定案今天下雖已大亂而法律不可全廢如普不重懲卽無以服江楚軍民之心重懲普而不薄懲青卽無以服徽人亦無以服普之心澄弟之病據來信已愈且言宜服清潤之品不宜補也

十二月二十四日

澄侯四弟左右十六日接弟手書具悉弟病日就痊愈至慰至幸惟弟服藥過多又堅囑澤兒請醫守治余頗不以爲然吾祖星岡公在時不信醫藥不信僧巫不信地仙此三者弟必能一一記憶今我輩兄弟亦宜略法此意以紹家風今年做道場二次禱祀之事聞亦常有是不信僧巫一節已失家風矣買地至數千金之多是不信地仙一節又與家風相背至醫藥則合家大小老幼幾於無人不藥無藥不貴迨至補藥吃出毛病則又服涼藥以攻伐之陽藥吃出毛病則又服陰藥以清潤之展轉差誤不至大病大弱不止弟今年春間多服補劑夏末多服涼劑冬間又多服清潤之劑余意欲勸弟少停藥物專用飲食調養澤兒雖體弱而保養之法亦惟在慎飲食節嗜欲斷不在多服藥也洪家地契洪秋浦未到場押字將來恐仍有口舌地仙僧巫二者弟向來不甚深信近日亦不免爲習俗所移以後尙祈卓識堅定略存祖父家風爲要天下信地信僧之人曾見有一家不敗者乎北菓公屋余無銀可捐己亥冬余登山踏勘覺其渺茫也